



basic education

Department:
Basic Education
REPUBLIC OF SOUTH AFRICA

SENIOR CERTIFICATE EXAMINATIONS/ NATIONAL SENIOR CERTIFICATE EXAMINATIONS

TSHIVENDA LUAMBO LWA HAYANI (HL)

BAMMBIRI LA VHUVHILI (P2)

2022

TSUMBANDILA YA U TOLA/MAKA

MARAGA: 80

Bammbiri ili li na masiatari a 27.

TSIVHUDZO KHA VHA^ŁTOLI/VHAMAKI

- Memorandamu uyu i tou vha tsumbandila fhedzi ya u thusa vhatoli/vhamaki.
- Memorandamu u tea u thoma wa dzulelwa dzulo nga vho^Łthe vha kwameaho khathihi na phanele ya u linga musi u tola/maka hu sa athu u thoma.
- Phindulo dza vhalingiwa dzi tea u eliwa nga u angaredza zwi tshi tevhedza vhukoni/ndeme yazwo.

MAGA A U TOLA/MAKA

1. Arali mulingiwa o fhindula mbudziso dzi fhiraho tshivhalo tsho tiwaho, kha vha make/łole fhedzi phindulo ya u thoma. (**Mulingiwa ha tei u fhindula mbudziso ndapfu na mbudziso pfufhi u bva kha lushaka luthihi lwa bugu/liñwalwa.**)
2. Arali mulingiwa o fhindula mbudziso dzothe nna u bva kha KHETHEKANYO YA A, (vhurendi ho randelwaho), kha vha make/łole phindulo mbili fhedzi dza u thoma.
3. Arali mulingiwa o fhindula mbudziso ndapfu mbili kana mbudziso pfufhi mbili kha KHETHEKANYO dza B na C, kha vha make/łole ya u thoma vha **litshe** ya vhuvhili. Arali mulingiwa o fhindula mbudziso dzothe nna, kha vha make/łole phindulo ya u thoma kha KHETHEKANYO inwe na inwe, tenda a vha o fhindula mbudziso nthihi pfufhi na nthihi ndapfu.
4. Arali mulingiwa a nga fhindula phindulo mbili hune ya u thoma ya vha yo khakhea ngeno ya vhuvhili i yone, kha vha make ya u thoma vha **litshe** ya vhuvhili.
5. Arali phindulo dzi songo nomboriwa nga ngona, kha vha make/łole vha tshi tevhedza memorandamu.
6. Arali vhukhakhi ha mupele^Łto vhu tshi nga khakhisa thalutshedzo, kha vha zwi make sa vhukhakhi. Arali zwi sa khakhisi thalutshedzo, kha vha make sa zwone.
7. *Mbudziso ndapfu/dza maanea:*
Arali maanea/phindulo ndapfu ya nga vha pfufhi kha tshivhalo tsha maipfi tsho tiwaho, vha songo ńea nda^Łiso, ngauri o no di dzula o diha^Łula ene muńe. Arali phindulo ya lapfesa u fhirisa mpimo, kha vha sedzuluse/łole nga ho teaho nyimele nahone vha songe mutumba na vhatoli vhahulwane. **Kha vha shumise rubriki dza u linga dzi re kha Aphendikisi ya A na B u tola maanea a vhalingiwa.**

8. *Mbudziso pfufhi:*
Arali mulingiwa a songo shumisa zwi^{devhe} musi o humbelwa uri a khouthé,
vha songo nea ndatiso.
9. Kha **mbudziso dzo vuleaho**, hu songo avhelwa maraga kha EE/HAI, kana kha NDI A TENDA/A THI TENDI. Thikhedzo/Khwathisedzo/thalutshedzo kha zwi vhe zwone zwi dzhielwaho nzhele kana zwi avhelwaho maraga.
10. Hu songo avhelwa maraga kha NDI NGOHO/A SI ZWONE kana NDI MBUNO/KUHUMBULELE KWAWE. Thikhedzo/Khwathisedzo/thalutshedzo kha zwi vhe zwone zwi dzhielwaho nzhele kana zwi avhelwaho maraga.
11. Phindulo dza mbudziso pfufhi dzi tea u ^{toliwa/makiwa} nga vhusedzi hu tshi dzhielwa nzhele mbofho dzo tshewaho/dzhiwaho kha dzulo ^{la} u linganyisa memorandamu.

KHETHEKANYO YA A: VHURENDI

VHURENDI HO RANDELWAHO

MBUDZISO YA 1: VHURENDI – MBUDZISO NDAPFU

XUXUXU – AA Mphaga

KUAVHELWE KWA MARAGA

Maraga dici avhelwe nga \hat{n} dila yone:

- Maraga dza 6 ndi dza mbuno.
- Maraga dza 4 ndi dza luambo. Dzone dici avhelwe nga \hat{n} dila heyi:
 - Maraga 4 arali mbuno dici 5–6
 - Maraga 3 arali mbuno dici 4
 - Maraga 2 arali mbuno dici 3
 - Maraga 1 arali mbuno dici 2
 - Maraga 0–1 arali mbuno dici 0–1
- Izwi hu tou vha mutheo wa u \hat{t} ola/maka mbudziso iyi. Zwi tevhelaho kha zwi shumiswe sa tsumbandila/maga a u thusedza musi vha tshi \hat{t} ola/maka mbudziso iyi. Fhedzi-ha, kha vha tendele phindulo dzo fhambanaho, dza vhusiki nahone dici \hat{t} anaho kuhumbulele na kusengulusele kwa vhudzivha.
- Vhalingiwa vha nga \hat{n} ekedza tsumbo/vhupfiwa/mbuno dzo angalalaho vhukuma musi vha tshi tikedza makumedzwa/vhuimo/kuvhonele kwavho.
- Kha vha shumise rubriki i re mafhedziselonu musi vha tshi \hat{t} ola/maka mbudziso iyi

XUXUXU – AA Mphaga

Marangaphanda

Thero ndi mulaedza muhulwane wa tshirendo/zwine tshirendo tsha khou amba nga hazwo/Zwine murendi a tama ri tshi zwi \hat{d} ivha. Ndima/tshitanza i/tshi vhumbwa nga mitaladzi/vese ya/dza tshirendo yo/dzo faredzaho muhumbulo muhulwane.

Mbuno

- Kha ndima/tshitanza ya/tsha u thoma, murendi u bvisela khagala uri muthu wa zwitshele na mazwifhi ha dzuli phasi, tshawe u takadzwa nga u sola vhathu vhunga a si na tsha mbiluni. Murendi u ita khuwelelo ya uri vhathu ri songo thetshelesa mazwifhi a mudziazwitshele hune a vhuya a tama uri ngavhe muthu uyu zwiito zwawe zwi tshi mu dzhenisa khomboni uri a lat \hat{e} matshilele awe.
- Kha ndima/tshitanza ya/tsha vhuvhili, murendi u bvisela khagala uri mudziazwitshele ha na tshivhuya, u a bvafha tshawe ndi u lutanya vhathu vhane vha andana.
- Kha ndima/tshitanza ya/tsha vhuraru, murendi u isa phanda na u sasalandza matshilele a mudziazwitshele ane ha dzuli phasi, ha tendi u kaidzwa, tshawe ndi u enda a tshi zwifha na u sola vhathu. Izwi zwi ita uri murendi a vhuye a mu tamele mashudu mavhi a u ri u kundwa ngani u thukhulwa milenzhe u itela uri a kundelwe nga u tsa a tshi gonya a tshi lutanya vhathu.

Magumo

Murendi o kona u shumisa ndima/zwitanza u bvisela khagala theroy a itshi tshirendo nge a sumbedza uri muthu wa zwitsheli na mazwifhi ndi mubva, ha na tsha mbiluni, ha kaidzwi ha dzuli fhasi nahone u takadzwa nga u lutanya vhathu.

[10]

MBUDZISO YA 2: VHURENDI – MBUDZISO PFUFHI

NTENDELE NDI VHE TSUMBANDILA – FR Modau

- 2.1 Murendi u ḥoda u khwaṭhisēda uri hu tshi itea zwi songo ḥōweleaho u songo tenda u vha wa u thoma u gidīmela u zwi ita, u nga namba wa vha wa u fhedzisela u dzhena khazwo.✓✓ (2)
- 2.2 Ndi tsha sonethev/, ngauri ndi ndima i re na mitaladzi /vese dza 14.✓ (2)
- 2.3 Muhum̄bulo muhulwane ndi wa uri vhaswa kha vha ḥomphē na u tenda u kaidziwa nga vhathu vhahulwane vha dovhe vha ḥutsheli zwikambi vhunga zwi zwiñwe zwa zwi vhangaho mpfu nnzhi dzavho.✓✓ (2)
- 2.4 Thounu i re fhasi i dzumbulula vhuđipfi ha murendi ha u pfa vhuđungu nga u vhaísia nga mikhwa ya vhaswa ine i fhedza yo vha dženisa khomboni na lufuni.✓✓ (2)
- 2.5 Ndi a tendelana nakwo, vhunga vhunzhi ha vhaswa vha ano mađuvha, a vha thetshesi vha tshi kaidzwa, a vha ḥomphi vhathu vhahulwane, tshavho ndi u ḥibandutshedza kha zwikambi zwine zwa shanduka zwivhulahi zwavho.
[Kana zwiñwevho zwi pfalaho.]✓✓ (2)
[10]

MBUDZISO YA 3: VHURENDI – MBUDZISO PFUFHI

MBILU I LILELA U GAVHA – WMR Sigwahulimu

- 3.1 Murendi u tama u bvisela khagala uri vhathu vha dzulela u ita vhuhovheleli ha u hovhelela midifho ya lino shango vha sa neti.✓✓ (2)
- 3.2 Ndi tsha alegori/Sathaya/ ngauri hu khou kaidzwa vhathu uri kha ri litshe u funesa madzanga a shango, ri fune u tshidzwa ha mimuya nga Mutshidzi/murendi u khou sasalandza maitele mavhi a muthu a u funesa zwa madzanga a shango.✓ (2)
- 3.3 Muhum̄bulo muhulwane ndi wa uri vhathu kha ri lilele u tshidza mimuya yashu nga u renda Mudzimu/Musiki ri ḥutsheli zwa shango zwi fushaho nama.✓✓ (2)

- 3.4 Thouni yo fholaho/ya fhasi i dzumbulula vhudipfi ha murendi ha u pfela vhutungu vhatu a tshi vhona vha tshi bva ndilani ya Mudzimu nga u lusa u wana madzanga/midifho ya lino shango.✓✓ (2)
- 3.5 Ndi a tendelana nae, ngauri vhunzhi ha vhatu vha a shandukisa kutshilele kwo teaho vha fhedza tshifhinga vha tshi khou lilela u diphin̄a nga zwa shango lino zwine zwa ita uri vha hangwe u tevhedza milayo ya Musiki.✓✓
[Muhumbulo u hanedzanaho na uyu kha u sedzuluswe/toliwe.] (2)
[10]

MBUDZISO YA 4: VHURENDI – MBUDZISO PFUFHI

NDI DAKALO-ZWILIGO – BR Mafhege

- 4.1 Murendi u ḥoda u ri vhudza uri muthu a sa ḥalifhela vhutshilo u a kundwa u bvelela/u a wa vhutshiloni.✓✓ (2)
- 4.2 Tshirendo itshi ndi tsha lushaka lwa alegori, ngauri murendi u khou ita uri vhatu vha ḥivhe uri zwine vha khou tshilela zwone a si zwa ndeme, zwa vhuthogwa ndi u tenda Mudzimu uri vha wane dakalo ḥone-ḥone.✓✓ (2)
- 4.3 Mulaedza une murendi a ḥoda u eletshedza vhatu ndi wa uri zwithe zwa fhano shangoni zwine ra ita zwone ndi mahandana, nahone zwi ri fhambanya na Mudzimu/Musiki.✓✓ (2)
- 4.4 Thounu i re fhasi i dzumbulula vhudipfi ha u pfa vhutungu nga zwine vhatu vha ita vha tshi litsha u tenda Mudzimu/Musiki.✓✓ (2)
- 4.5 Ndi a ima nae:
-Vhatu ri hangwa Mudzimu ri tshi itela u takadza yashu mivhili.
-Madakalo aneo kanzhi ha vhi madakalo a no ya thambo, a ri wedza khomboni.
-Zwithe zwa lino shango zwi a fhela, ndi mahandana.
- [Zwivhili fhedzi zwi pfalaho.]✓✓
[Muhumbulo u hanedzanaho na uyu kha u sedzuluswe/toliwe.] (2)
[10]

NA

VHURENDI VHU SONGO RANDELWAHO (HA KHOMBEKHOMBE)

MBUDZISO YA 5: VHURENDI – MBUDZISO PFUFHI

NWANANGA – S Muremela

- 5.1 Ndi tsha sonethev $\ddot{\text{v}}$ ngauri tsho vhumbwa nga ndima i re na mitaladzi/vese dza 14. ✓

KANA

Tsatsaladzo/sathayav $\ddot{\text{v}}$ ngauri murendi u sasaladza u vha na vhana hashu, uri a zwi $\ddot{\text{d}}$ isi dakalo zwi $\ddot{\text{d}}$ isa thambulo.✓

(2)

- 5.2 Khaesurav $\ddot{\text{v}}$, ngauri hu na u awelanyana ha dovha ha bvelwa phanda na u renda, hu khou khwathisedzwa ndeme ya u takala.✓

(2)

- 5.3 Muhumbulo muhulwane une murendi a $\ddot{\text{t}}$ oda u bvisela khagala ndi wa uri kha muthu a humbulaho uri u vha na nwana zwi $\ddot{\text{d}}$ isa dakalo, kha zwi $\ddot{\text{d}}$ ivhe uri a si zwone vhunga na onoyo nwana a si na dakalo $\ddot{\text{l}}$ o fhelelaho.✓✓

(2)

- 5.4 Mutevhetsindo wa u ongolowa ✓ u re kha itshi tshirendo u dzumbulula vhu $\ddot{\text{d}}$ ipfi ha murendi ha u pfela vhu $\ddot{\text{t}}$ ungu vhatu vhane vha humbula uri u beba nwana zwi $\ddot{\text{d}}$ o vha $\ddot{\text{d}}$ isela dakalo, ngeno vha sa $\ddot{\text{d}}$ ivhi uri na ene nwana a tshi bebwa u vha a si na na dakalo $\ddot{\text{l}}$ o fhelelaho.✓

(2)

- 5.5 Ndi a ima nae, ngauri vhunzhi ha vhabebi vhane vha vha na vhana kanzhi vha dzulela u $\ddot{\text{l}}$ a mbilu nga kutshilele kwavho na vhone vhana vha tshi lila nga vhabebi vhavho. ✓✓

KANA

A thi imi nae, ngauri vhabebi vha hone vhane u vha havho na vhana two vha $\ddot{\text{d}}$ isela dakalo ngauri vha khou $\ddot{\text{d}}$ iphi $\ddot{\text{n}}$ ga mitshelo yavho/vhana vha unda vhabebi vhavho/ vha vha bvisa vhushaini he vha vha vhe khaho. ✓✓

(2)

[10]

THANGANYELO YA KHETHEKANYO YA A:

30

KHETHEKANYO YA B: NGANEA/FOLUKULOO

NGANEA

MBUDZISO YA 6: NANDI NDI SHENGA? – MBUDZISO NDAPFU

KHA VHA DZHIELE NZHELE: Vha shumise adendamu iyi khathihi na rubriki i re mafhedziseloni.

Maraga dza mbuno: 15.

Maraga dza tshivhumbeo na luambo: 10.

Maraga dza tshivhumbeo na luambo dzi avhelwe nga ndila i tevhelaho:

- Tshivhumbeo: (Mathomo, mutumbu, magumo) – maraga dza 6
- Luambo: maraga 4 dzo avhelwa nga ndila hei:
 - Arali e kha khritheria 4–5 u wana maraga 4
 - Arali e kha khritheria 3 u wana maraga 3
 - Arali e kha khritheria 1–2 u wana maraga 2

- Izwi hu tou vha mutheo wa u ūtola/maka mbudziso iyi. Zwi tevhelaho kha zwi shumiswe sa tsumbandila/maga a u thusedza musi vha tshi ūtola/maka mbudziso iyi. Fhedzi-ha, kha vha tendele phindulo dzo fhambanaho, dza vhusiki nahone dzi tanaho kuhumbulele na kusengulusele kwa vhudzivha.
- Vhalingiwa vha nga nekedza tsumbo/vhupfiwa/mbuno dzo angalalaho vhukuma musi vha tshi tikedza makumedzwa/vhuimo/kuvhonele kwavho.
- Kha vha shumise rubriki i re mafhedziseloni musi vha tshi ūtola/maka mbudziso iyi.

Marangaphanda

Puloto ndi ndunzhendunzhe ya mafhungo, lune tshiwo tshiniwe tsha disa tshiniwe, u bva mathomoni u swika magumoni a bugu.

Nyito i takuwaho ndi tshipida tsha puloto tsha vhuvhili u bva kha kubveledzele kwa mafhungo, hune zwiwo zwi vha zwi tshi khou tevhekana u swika mat̄hakheni a bugu.

Mbuno

Kha nyito i takuwaho ndi hune ra vhona thaidzo i tshi khou aluwa zwi tshi t̄utuwedzwa nga u tevhekana ha zwiwo. Kha nganea iyi ri wana nyito i takuwaho i tshi khou bveledzwa nga zwiwo zwi tshi tevhekana nga ndila i tevhelaho:

- Musi Vho Luvhani vha tshi vhudza munna wavho uri vho vhifha muvhilini ngeno Vho Madilaga vho vha vho amba uri a vha tsha ūtoda u vha na muñwe ñwana.
- Vho Madilaga vha vhudza Vho Luvhani uri tshiné tsha nga tandulula thaidzo iyi ndi ha musi mihwalo i tshi nga ngalangadzwa kana ñwana a tou nekedzwa kha vhala vhane vha si vhe na vhakoma.

- Muhumbulo uyo wo do dina Vho Luvhani lwe vha ita na u bva muđini vhusiku vha songo onesa muthu vha ya hayani ha havho, vha fheletshedzwa nga Vho Muvhi he vha vho fhira vha tshi dzhia Vho Mainganye khaladzi a Vho Madilaga.
- Musi fhungo ili li tshi sengiwa Vho Madilaga vho do humbela pfarelo phanda ha Vho Muvhi, Vho Mainganye na Vho Luvhani uri a vha tsha do dovha vha zwi amba.
- Hezwi zwe ita uri Vho Luvhani vha dalele mushumelavhapo Vho Silima ngei kiliniki vhunga vho vha vha tshi khou dinwa nga mutsiko wa malofha.
- Musi Vho Luvhani vha tshi ya kiliniki vho fhelekedzwa nga Vho Madilaga vha vhudzwa u pfi nwana u do tea u yo bebelwa sibadela vhunga hu na zwinwe zwi songo dzudzanyeaho kha nwana.
- Musi Vho Luvhani vha tshi vhofholowa sibadela vha wana uri vho beba nwana e na lino la nthia.
- Mafhungs aya o do dina Vho Madilaga lwe vha pfa vha tshi shona vha tshi humbula uri vho vha vho amba uri ho vha ho fanela mihwalo yo ngalangadzwa kale.
- Musi radio ya Fhatulushaka i tshi divhadza uri ho bebiwa nwana e na lino ngei sibadela tsha Vhutshidzi zwa pfiwa nga Vho Maambavhainwe, vhe vha do fhedza vho gidimela henengei u yo vhona.
- Musi nwana a tshi vhuya sibadela Vho Madilaga vho hana u mu ira dzina ngauri vha pfa vha sa koni u tanganedza uri ndi nwana wavho.
- Musi Vho Luvhani vha tshi semiwa nga Vho Ana nga murahu ha musi nwana wavho Muyanalo a tshi lilela mpopi wa Tshifhiwa. Vho vha sema vha vha vhudza nga nwana wavho Tshifhiwa uri ndi shenga nahone a luma muthu tshilonda tsha hone a tshi fholi.
- Musi Vho Luvhani vha tshi vhudza Vho Madilaga zwauri Vho Ana vho vha sema Vho Madilaga vho isa phanda na u vha vhudza uri ndi nga u sa pfa havho zwine zwa ita uri vha bebe nwana a na lino.
- Musi Ladzani a tshi vhuya hayani a tshi bva tshikoloni o vhaaisala muyani ngauri vhanwe vhana vho vha vha tshi khou mu sea uri ha hawe hu na shenga. Vho Luvhani vho mu talutshedza uri ndi nga mini vhatu vha tshi amba ngauralo a kona-ha u zwi pfesesa.
- Musi Vho Ratshili, murangaphanda wa siviki vha tshi ramba muđangano wa vhadzulapo uri lushaka lu bviselwe khagala nga ha uri shenga ndi mini. Muđangano uyo wo vha wavhuđi ngauri wo sia vhadzulapo vha tshi vho pfesesa.
- Vho Madilaga vha ya vha vhudza khaladzi avho Vho Mainganye uri Vho Luvhani a vha tsha vha thetshelesa nahone vha diita munna wa mudi. Mafhungs ayo o wanala uri a si one nga murahu ha uri Vho Luvhani vha ambe nyimele yothe ya mafhungs kha Vho Mainganye.
- Musi Vho Luvhani vha tshi ya u onesa kha vha havho na kha Vho Madilaga na Vho Mainganye, uri vhone vha khou ya u dzula Polokwane na Tshifhiwa.
- Musi Tshifhiwa a tshi tuwa na mme awe a tshi bva e Polokwane u yo onesa khotsi awe na makhadzi wawé uri ene u khou ya u dzhena tshikolo ngei Germany ngauri o wana ndamagedzo ya u guda zwa vhuinzhiniara ha u lugisa na u fhatu dzigoloi dza ha Mercedes Benz ngauri o vhonala e musidzana o talifhaho nga maanda

- Naho Tshifhiwa o vha a sa tsha dzula afha hayani, samba la uri o bebwa e na lino lo ita uri Vho Ana muhura wa Vho Madilaga vha di sala vha tshi vha pomoka uri zwibudzana zwavho a two ngo vhulawa nga mmbwa, two vhulawa nga shenga line la vha Tshifhiwa. Vho Ana vho do wanala vha na nanga getheni ya Vho Madilaga vha tshi khou hasha mishonga.

Magumo

Munwali o kona u bveledza nyito i takuwaho sa tshipida tsha puloto buguni iyi ngauri ri vhona hu na u lunzhedzana zwavhu di ha mafhungo. Tshiro tshiwe tshi tshi disa tshiwe u swika mathakheni. Ndi ngazwo bugu iyi i tshi takadza vhukuma. [25]

MBUDZISO YA 7: NANDI NDI SHENGA? – MBUDZISO PFUFHI

- 7.1 Ndi tshipida tsha nyito i takuwaho/u bveledza mafhungo.√ Ngauri mafhungo a muta wa ha Madilaga a uri a vha khou tanganedza riwana o bebwaho e na lino, a khou vhifha a tshi ya phanda/Vho Luvhani vha khou lusa u tandulula thaidzo ya u kolelwa uri vho beba shenga nga u tenda u ya u amba mutanganoni wo rambiwaho nga vha siviki.√ (2)
- 7.2 Vho Madilaga vha bveledzwa sa munna a re na mbiti/a sa lengi u sinyuwa. Ndi muthu a si na vhudifhinduleli nahone a sa imeli zwithu zwa mutani wawe. Ndi muthu a si na lufuno. Ndi muthu a sa thetshelesi.
- [Zwivhili fhedzi zwi pfalaho.]√√ (2)
- 7.3 Ndi khudano ya nga nnnda.√ Ngauri ri pfa Vho Madilaga vha tshi khou semana na Vho Luvhani vha tshi simesa uri ndi ngani hu tshi khou ambiwa mafhungo nga riwana wavho ngeno vhone vhe siho.√ (2)
- 7.4 Vho Madilaga vha dzula vhuponi ha mahayani, Tshandebvu, hune munna u dzhiiwa sa thoho ya mudi nahone e ene ane a dzhia tsheo a sa hanedzwi nga mufumakadzi wawe.√√ (2)
- 7.5 Vho Luvhani vha sumbedza uri vhone vha do lwa nga ndila dzothe uri Tshifhiwa a bvelele, zwine two fhedza two bvelela musi vha tshi pfuluwa na riwana wavho Tshifhiwa vha ya vha dzula Polokwane, he a swika a dzhena tshikolo a phasa zwavhu di a fhedza a gudela na mushumo Germany.√√ (2)
- 7.6 - Vho Luvhani vho vha vha tshi dzula vha tshi kolelwa nga vhahura.
- Vha farwa nga mutsiko wa malofha.
- Two ita uri vha si ye mudi wavho vha ye u dzula Polokwane.
- Vhana na vhone vho vha vha tshi kolelwa tshikoloni.
- Two ita uri vhana vha aluwe vha si na thogomelo ya vhabebi vhothe.

[Maraga THARU kha mbuno THARU dici pfalaho.]√√√ (3)

- 7.7 Vhuholefhali a vhu thivheli muthu u bvelela. Tshifhiwa we a bebwa vhathu vha ri ndi muholefhali u fhedza a bvelela vhutshiloni a vha inzhiniara./ U shaya ndivho zwi a dina. Tshifhiwa vha vhona uri ha nga bveleli ngauri a bebwa e na lino lithihi, fhedzi a fhedza a tshi vha na pfunzo dza nthā nahone a guda na mashangoni a seli

[Maraga 2 kha muhumbulo u pfalaho.]✓✓

(2)

- 7.8 Thaidzo ya Vho Luvhani ya u sathulwa havho na u sa tanganedzwa ha Tshifhiwa i mbo di fhela, ✓✓ ngauri Vho Ana vha da vha humbelo pfarelo, muta wa Vho Madilaga u a vhuelana na vhathu vha shango vha thoma u tanganedza Tshifhiwa.✓

(3)

- 7.9 Muhumbulo muhulwane ndi wa uri munna na mufumakadzi vha tea u tikedzana kha nyimele dzothē tshifhinga tshothē ngauri zwa sa ralo ri do diwana ro no vusa vhuswiña, dziphambano, thalano na khakhathi dzi sa takuwi.✓✓

(2)

- 7.10 Zwo tea, ngauri Vho Madilaga a vha vha tikedzi afha mutāni. U pfuluwa zwi thusa Vho Luvhani na riwana wavho Tshifhiwa uri vha bve kha mitsiko ya vhathu nahone Tshifhiwa a kone u isa pfunzo dzawe phanda zwavhuđi.

KANA

A zwo ngo tea, ngauri muthu arali e na thaidzo ha tei u shavha/pfuluwa a sia mudi/munna/mufumakadzi a yo dzula huiwe ngauri zwi ita uri vhana vha aluwe vha si na thogomelo ya vhabebi vhothe.✓✓

(2)

- 7.11 - Ndo vha ndi tshi nga vha vhidza ra dzula fhasi navho mafhungo a sengiwa.
- Ndo vha ndi tshi nga dzhia mulandu wa ya kha vha mulayo.
- Ndo vha ndi tshi nga vhiga mulandu mukomani.
- Ndo vha ndi tshi nga vha isa kha vhahulwane vha havho uri vha vha kaidze.

[Maraga THARU kha mbuno THARU dici pfalaho.]✓✓✓

(3)

[25]

MBUDZISO YA 8: *ISHA LA MITODZI* – MBUDZISO NDAPFU

KHA VHA DZHIELE NZHELE: Vha shumise adendamu iyi khathihi na rubriki i re mafhedziseloni.

Maraga dza mbuno: 15.

Maraga dza tshivhumbeo na luambo: 10.

Maraga dza tshivhumbeo na luambo dzi avhelwe nga ndila i tevhelaho:

- Tshivhumbeo: (Mathomo, mutumbu, magumo) – maraga dza 6
- Luambo: maraga 4 dzo avhelwa nga ndila hei:
 - Arali e kha khritheria 4–5 u wana maraga 4
 - Arali e kha khritheria 3 u wana maraga 3
 - Arali e kha khritheria 1–2 u wana maraga 2

- Izwi hu tou vha mutheo wa u t̄ola/maka mbudziso iyi. Zwi tevhelaho kha zwi shumiswe sa tsumbandila/maga a u thusedza musi vha tshi t̄ola/maka mbudziso iyi. Fhedzi-ha, kha vha tendele phindulo dzo fhambanaho, dza vhusiki nahone dzi tanaho kuhumbulele na kusengulusele kwa vhudzivha.
- Vhalingiwa vha nga nekedza tsumbo/vhupfiwa/mbuno dzo angalalahlo vhukuma musi vha tshi tikedza makumedzwa/vhuimo/kuvhonele kwavho.
- Kha vha shumise rubriki i re mafhedziseloni musi vha tshi t̄ola/maka mbudziso iyi.

Marangaphanda

Puloto ndi ndunzhendunzhe ya mafhundo, tshiro tshirwe tshi tshi disa tshirwe, u bva mathomoni u swika magumoni a bugu. Nyito i takuwaho ndi tshipida tsha puloto tsha vhuvhili u bva kha kubveledzele kwa mafhundo, hune zwiwo zwi vha zwi tshi khou tevhekana u swika mathakheni a bugu.

Mbuno

Kha nyito i takuwaho ndi hune ra vhona thaidzo i tshi khou aluwa zwi tshi tutuwedzwa nga u tevhekana ha zwiwo. Kha nganea iyi ri wana nyito i takuwaho i tshi khou bveledzwa nga zwiwo zwi tshi tevhekana nga ndila i tevhelaho:

- Thaidzo ya u todou u pometshedza Aifheli thumbu i si yawe i pfala i tshi khou bvela phanda, izwi zwi khwathisedza nga zwiwo two faranaho two livha mathakheni.
- U wanala ha uri Maria o dihwala ngei Musina dokotelani musi o fheletshedzwa nga Aifheli hu u pfumbisa uri na ngoho mihwalo ndi yawe, zwa sumba uri maano a Vho-Loshani na Maria a khou shuma.
- U tutuwedza tshothe uri tshiphiri tshi sa divhonadze, munyanya wa mbingano ya Maria na Aifheli u mbo di dzudzanywa uri u tavhanye u vha hone. Vha lushaka vho di vha vhathu vhane vha hanedzana na la u ri Vho-Loshani vha todani kha nzudzanyo dza mbingano ya Aifheli ngeno vha sa tou vha shaka la tsini.

- Nga u sa ḋivha flungo/tshipiri, Aifheli o vha ene a no vha imelela havha Vho-Loshani, a tshi sumbedza uri vha sa vha hone nzudzanyo dza munyanya dzi ḋo rothola.
- Maria u ḋi dzulela u vha na valuvalu kana nyofho dza uri tshipiri tshi nga bvela khagala munyanya u sa athu swika nge khonani yawe Thikholelwia tshi amba nae sa a no nga u ḋivha zwirīwe.
- Naho hu na zwithithisi fhaṭa na fhaṭa munyanya u fhedza u tshi vha hone, nahone muhulusa u takadzaho.
- Thaidzo ya Maria i khou ḋana i tshi ya musi a tshi humbula uri riwana a tshi bebwa u ḋo fana na nnyi, zwa ita uri a dzule a tshi ṭamba nga madi a mashika a munna wawe.
- U ita na u vhudza munna wawe uri vha pfulutshele Thohoyandou.
- U bebwa ha Rotondwa a sa fani na Aifheli khotsi awe nga vala zwo nea Maria thaidzo i sa takuwi nge a zwi limuwa uri vhathe vha ḋo zwi humbula uri ndi riwana wa Vho-Loshani.
- Rotondwa u bebwa nga riwaha muthihi na Musatondwa riwana wa Vho-Loshani na Vho-Josephine.
- Vhuvhili havho vha hula vha tshi sumbedza u vha na lufai, lune zwa kanganyisa na vhainwe vha vhagudisi tshikoloni
- Vhana avha vha phasa pfunzo dza sekondari vha ya Yunivesithi ya Venda. Henefha ndi hune vhana avha vha funana.
- Hu vuwa khakhathi musi Musatondwa na Rotondwa vha tshi ḋivhadza vhabebi nga ha u funana havho. Ngei kha muṭa wa Tshipate, Vho-Maria vha tou dadadzela kule ngeno Aifheli a tshi khou zwi pfesesa. Muṭani wa Vho-Loshani, na vhone a vha ḫodi na u pfa tshithu. Zwiwo zwoṭhe hezwi zwa nyito i takuwaho zwi ri livhisa kha tshipida tsha mathakheni.

Magumo

Muiwali o kona u bveledza nyito i takuwaho i re na zwiwo zwo faranaho zwe zwa ita uri ri kone u swika mathakheni. Izwi ri zwi vhona musi maano a u luka tshipiri tsha u pometshedza Aifheli thumbu i si yawe a tshi lunzhedzana zwavhudzi.

[25]

MBUDZISO YA 9: ISHA LA MITODZI – MBUDZISO PFUFHI

- 9.1 Ndi tshipida tsha nyito i takuwaho/u bveledza mafhungo.✓ Ngauri ri khou vhona vhukwila he Vho-Loshani na Maria vha vhu luka ha uri munyanya u tea u ḫavhanyiswa i ndila ya u tsireledza tshipiri tshine vha ita.✓ (2)
- 9.2 -Aifheli u bveledzwa sa muthu a sa ḫodi dzikhakhathi a no funa mulalo.
-U bveledzwa sa muthu o ḫalaho lufuno.
-Muthu a si na vhutevheleli ha zwithu zwi sa fhaṭi.

[ZWIVHILI fhedzi zwi pfalaho.]✓✓

(2)

- 9.3 Ndi khu^qdano ya nga nn^qda.✓Ngauri ri pfa nga ha u fhambana ha muhumbulo wa Aifheli na mukomana wawe Thathani na muzwala wawe Vho Dafita wa uri Vho Loshani vha tshimbidze munyanya ngeno vhe si shaka.✓ (2)
- 9.4 Vho-Dafita na Thathani vha dzula vhuponi ha mahayani, Folovhodwe, hune u ya nga mvelele vha tenda uri mafhungo a mu^qtani a dzudzanywa nga vha mu^qta hu si na u dzhenelelwa nga vhatsinda.✓✓ (2)
- 9.5 Thathani na Vho-Dafitha vha sumbedza uri Vho-Loshani a vha t^odei kha nzudzanyo ya munyanya wa Aifheli ngauri vha sumbedza uri vha d^o vha remisa t^ohoho, zwe zwa fhedza zwo itea musi Aifheli a tshi zwi wana uri Vho-Loshani vha na vhuskaka na mufumakadzi wawe.✓✓ (2)
- 9.6 - Zwi vhanga malwadze kha Vho-Maria na Vho-Josephine.
- Vhutama vhukati ha Aifheli na Vho-Loshani hu mbo di pfuvha.
- Vho-Loshani vha mbo di shanduka vha thoma u shumisa zwikambi lwo kalulaho.
- Zwi ita uri Vho-Loshani vha fhedze vho pfulutshela Shakadza.
- [Maraga THARU kha mbuno THARU dici pfalaho.]✓✓✓ (3)
- 9.7 Mu^qwali u t^oda u bveledza ndivho ya uri zwe the zwine vhatu vha ita vho dzumbama zwi d^o fhedza zwo bvela khagala.✓✓ (2)
- 9.8 Aifheli u na thaidzo ya uri ndi nga mini Maria na Vho-Loshani vha sa tikedzi uri Musatondwa na Rotondwa vha malane, u khakhisana havho zwi ita uri Maria a ambe ngoho uri vhana avho ndi vha Vho-Loshani.✓✓✓ (3)
- 9.9 Muhumbulo muhulwane une mu^qwali a t^oda u u sumbedza ndi wa uri u sa fulufhedzea ha vhatu mbinganoni zwi na masiandaitwa a si avhudⁱ.✓✓ (2)
- 9.10 Zwo tea, ngauri vhuvhili havho Rotondwa na Musatondwa ndi vhana vha dzofha lithihi la Vho-Loshani, ngauralo a zwi tendelwi nga ndavhuko uri vhana vha muthu muthihi vha malane.✓✓ (2)
- 9.11 - Ndo vha ndi tshi d^o amba na Maria uri a litshe munna wanga.
- Ndo vha ndi tshi d^o humbelu mashaka a tsini a mi^qta mivhili uri ri dzule fhasi ri dzudzanye.
- Ndo vha ndi tshi d^o humbelu munna wanga uri vha litshe zwithu zwine vha khou ita ngauri zwi d^o ri pwashela mu^qta washu.
- Ndo vha ndi tshi d^o ya nda humbelu thuso kha vhafunzi/vhashumelavhapo uri vha dzhenelele.
- [Maraga THARU kha mbuno THARU dici pfalaho.]✓✓✓ (3)

FOLUKUŁOO

KHUVHANGANYO YA FOLUKUŁOO – RV Tshikovhi

MBUDZISO YA 10: KHUVHANGANYO YA FOLUKUŁOO (MBUDZISO NDAPFU)

KHA VHA DZHIELE NZHELE: Vha shumise adendamu iyi khathihi na rubriki i re mafhedziseloni.

Maraga dza mbuno: 15

Maraga dza tshivhumbeo na luambo: 10

Maraga dza tshivhumbeo na luambo dzi avhelwe nga ndila i tevhelaho:

- Tshivhumbeo: (Mathomo, mutumbu, magumo) maraga dza 6
- Luambo: maraga 4 dzo avhelwa nga ndila hei:
 - Arali e kha khoudou 4–5 u wana maraga 4
 - Arali e kha khoudou 3 u wana maraga 3

Arali e kha khoudou 1–2 u wana maraga 2

- Izwi hu tou vha mutheo wa u ūtola/maka mbudziso iyi. Zwi tevhelaho kha zwi shumiswe sa tsumbandila/maga a u thusedza musi vha tshi ūtola/maka mbudziso iyi.
- Vhalingiwa vha nga ḥekedza tsumbo/vhupfiwa/mbuno dzo angalalaho vhukuma musi vha tshi tikedza makumedzwa/vhuimo/kuvhonele kwavho.
- Vhalingiwa vhalavhelelwa u nanga zwibveledzwa zwo teaho u bva buguni yavho u itela u khwathisedza likumedzwa line la khou sengulusiwa.

Kha vha shumise rubriki i re kha siaṭari la 26 musi vha tshi ūtola/maka mbudziso iyi.

Marangaphanda

Puloto ndi ndunzhendunzhe ya mafhundo u bva mathomoni u swika magumoni a tshibveledzwa. Puloto ya ngano yo khethekanywa ya bva zwipiđa zwiraru, mvulatwinga, mutumbu na thasululo. Muhumbulo muhulwane ndi zwine tshibveledzwa tsha khou amba nga hazwo. Tshikhodo tshi vhumbwa nga mitaladzi ine yone i vhumba ndima/tshitanza tshi tikedzaho muhumbulo muthihi

Mvulatwinga

- Muanetsheli u ita uri vhathelesi vha dilugisele u thetshelesa nga u thoma nga u ri, ‘Salungano! Salungano!’

Mbuno

- Hu vha na mutangano wa shango lothe, hu tshi vuwa khanedzano, vha tshi ri vhathu kha ri tshile ri sa fi, vhaiwe vha ri ri tea u fa. Hu ruiwa dongololo na luaviavi mudzimuni. Dongololo li fhiwa mulaedza wa uri vhathu vha tshile u ya nga hu sa fheli, vha songo fa, luaviavi lwa newa mulaedza wa uri vhathu vha fa vha songo tsha vuwa.
- Dongololo la tuwa phanda zwa nea vhathu fulufhelo la uri li do swika phanda ha luaviavi. Dongololo lo do wana mbula ndilani, la dzi roda, la fhedza nga u edela heneffo murini. Luaviavi lwa dedengela lwa vhuya lwa swikisa mulaedza wa uri vhathu vha fa vha songo tsha vuwa.

Vhaṭavhatsindi vha Thengwe

- Tshikhodo tshone tsho sumbedza fhethu hune vhaṭavhatsindi vha wanala hone/vhubvo, vhane vha a kona u sola muthu e heneffo a sa pfe tshithu, vhadziazwipphiri, vha sa buli tsha mbiluni, ndi vhone vhatiki vha Vhavenda, dziñanga na u wanwa muno, a si vhavhusi tshavho vha toda u lima, vhadziavhudele na vhulondo, a ho ngo dala vhapfufhi vhunzhi havho ndi vhalapfu, kanzhi vhudzulo havho ndi dzithavhani na madini

Magumo

Muiwali o kona u shumisa zwibveledzwa zwa sialala u bveledza puloto na u tikedza muhumbulo muthihi muhulwane, afha ndi hune ra vhona zwiitisi two iteaho uri vhathu vha fe vha si tsha vuwa two itiswaho nge dongololo la ungwa nga mbula ndilani, la vho fhirelwa nga luaviavi lwe lwa swikisa mulaedza wa u thoma. Ndi ngazwo na namusi vhathu vha tshi fa vha si tsha vuwa. Kha tshikhodo ro kona u vhona hune Vhaṭavhatsindi vha dzula hone, mvumbo dzavho na zwine vha zwi kona.

[Afha vhalingi vho nea tsumbo dzavho, vhalingiwa vha nga di shumisa tsumbo dzo fhambanaho na idzi, tenda dza vha dici tshi khwathisedza likumedzwa.]

[25]

MBUDZISO YA 11: KHUVHANGANYO YA FOLUKULOO – MBUDZISO PFUFHI

MBUDZISO YA 11 – MBUDZISO PFUFHI

PHINDULO DZA TSHIPIDA TSHA C: LUNGANO

- 11.1 Ndi tsha mvulatwinga/mathomele, muanetsheli u vha a tshi khou eletshedza vhathetshelesi uri kha vha dilugisele u thetshelesa. ✓✓ (2)
- 11.2 Gwahavha li tanwa sa phukha ine ya kondelela, i sa fheli mbilu nahone i sa bvafhi. ✓✓ (2)
- 11.3 Vhombila vha fhedza vho wana mutshila mupfufhi/mutuku. ✓✓ (2)

- 11.4 Mbila yo kundwa mutshila nga u rumela.√√ (2)
- 11.5 Kha ri litshe u bvafha na mazwifhi vhunga zwi na masiandaitwa a si avhudzi/Vhubva na mazwifhi zwi nga ita uri muthu a sa diphiñe vhutshiloni hawe hothe.√√ (2)
- 11.6 Ndivho ya muñwali ndi ya u toda u sumbedza uri u kondelela, u sa fhela mbilu, u sa bvafha u sa sumbedzi u vha na mukale zwi disa zwivhuya zwavhuđi vhutshiloni. (2)
- 11.7 - Ndo vha ndi tshi nga tou vha eletshedza uri kha vha ṭutshele maitele eneo.√
- Ndo vha ndi tshi nga humbela vhañwe vhathu vhahulwane uri vha nthuse kha u tsivhudza vhombila uri vhubva vhu lisa muthu tshikav√
- Ndo vha ndi tshi nga vha dzima zwiliwa zwe nda ṭundav (3)

PHINDULO DZA TSHIBVELEDZWA TSHA D: VHURENDI HA SIALALA (TSHIKHODO)

- 11.8 Murendi u toda u bvisela khagala zwauri Thovhele Khosi Phiriphiri Tshivhase muvhuso wawe u a konda. √√ (2)
- 11.9 Ndovhololo heyi i ṭodou sumbedza uri Thovhele Tshivhase ndi Khosi i re na maanda mahulu. √√ (2)
- 11.10 Tshiga tsha tshigarukela tshi khou ombedzela uri Thovhele Tshivhase ndi khosi i re na vhuhalu, maanda na tshiñuhu, i sa ofhi.√√ (2)
- 11.11 I bvisela khagala uri Thovhela Tshivhase ndi mulwi, a si goswi ane u na vhuñali ha u kona u dipilela musi e nndwani.√√ (2)
- 11.12 U vhaisa vhañwe vhathu nga u vha shakulisa miđini yavho wa fhedza nga u i longa mulilo a si zwavhuđi.√√ (2)

THANGANYELO YA KHETHEKANYO YA B:

25

KHETHEKANYO YA C: DIRAMA

ULEMA HU FHIRA U LOTSHELWA – IP Demana

MBUDZISO YA 12: *ULEMA HU FHIRA U LOTSHELWA – MBUDZISO NDAPFU*

KHA VHA DZHIELE NZHELE: Vha shumise adendamu iyi khathihi na rubriki i re mafhedziselon.

Maraga dza mbuno: 15

Maraga dza tshivhumbeo na luambo: 10

Maraga dza tshivhumbeo na luambo dzi avhelwe nga ndila i tevhelaho:

- Tshivhumbeo: (Mathomo, mutumbu, magumo) maraga dza 6
- Luambo: maraga 4 dzo avhelwa nga ndila hei:
 - Arali e kha khoudu 4–5 u wana maraga 4
 - Arali e kha khoudu 3 u wana maraga 3
 - Arali e kha khoudu 1–2 u wana maraga 2

- Izwi hu tou vha mutheo wa u tola/maka mbudziso iyi. Zwi tevhelaho kha zwi shumiswe sa tsumbandila/maga a u thusedza musi vha tshi tola/maka mbudziso iyi.
- Vhalingiwa vha nga nekedza tsumbo/vhupfiwa/mbuno dzo angalalaho vhukuma musi vha tshi tikedza makumedzwa/vhuimo/kuvhonele kwavho.
- Kha vha shumise rubriki i re kha siatari la 26 musi vha tshi tola/maka mbudziso iyi.

ADENDAMU

Marangaphanda

Khudano ndi u sa andana kana u fhambana ha mihumbulo vhukati ha vhabvumbedzwa kana vhatambi kana mutambi ene muñe. Khudano i na tshaka mbili dzine dza vha khudano ya ngomu na khudano ya nnda. Kha ino bugu ho angaredzwa tshaka dzothe dza khudano. Muhumbulo muhulwane ndi zwine dirama kana litambwa la khou amba nga hazwo. Muhumbulo muhulwane diramani iyi ndi wa u lemiwa ha Mashudu nga mme awe, zwine zwa fhedza zwi na masiandaitwa a si avhuđi.

Mbuno

Buguni iyi hu vha na khudano dzo fhambanaho dzine dza bvelela hu u thusedza u bveledza muhumbulo muhulwane wa u lemala ha Mashudu. Khudano idzi ndi dzi tevhelaho:

- Khudano i vha hone vhukati ha Mashudu na Vho-Nefefe musi vha tshi mu rwela u vhuya vhusiku.

- Vho-Nefefe vha kuðana na Vho-Marīta nga ñwambo wa ene Mashudu. Vho-Marīta vha semana na Vho-Nefefe vha tshi khou lamulela Mashudu uri a songo rwiwa ngauri ndi ñwana wa musidzana
- Mashudu u kuðana na khaladzi awe Khwaðhisani a tshi khou mu kaidzela uri u a bvafha ngauri ha iti tshithu, u shumelwa nga mme awe ene o dzula.
- Izwi zwi ita uri Vho-Marīta vha sinyutshele Khwaðhisani lune zwa vhanga khudano vhukati havho.
- Vho-Marīta vha kuðana na Khwaðhisani musi a tshi lingedza u vha eletshedza uri vha litshe u lema Mashudu.
- Hu vha na khudano vhukati ha Mashudu na Lufuno musi Lufuno a tshi ri ha todì vhabebi vha Mashudu vha tshi zwi ðivha uri vha a funana. Zwithu hezwi zwi sinyusa Mashudu.
- Vha dovha hafhu u kuðana musi Mashudu a tshi funana na Tshibio a tshi khou itela u vhaisa ene Lufuno.
- Mudededzi Vho-Ludwevha na Mashudu vha a kuðana nge Mashudu a si ñwale mushumo wavho wa tshikolo. Vha fhedza vha tshi mu kaidza na u mu rwa.
- U rwiwa ha Mashudu nga Vho-Ludwevha hu vhanga khudano vhukati havho na Vho-Marīta vhane vha fhedza vha tshi vha ðela tshikoloni vha vha sema.
- Hu vha na khudano vhukati ha Khwaðhisani na mme awe musi a tshi vha kaidzela u sema mudededzi Vho-Ludwevha vhane vha tou vha tevhela tshikoloni.
- Vho-Nefefe vha kuðana na Mashudu nga murahu ha musi ðohoyatshikolo Vho-Lañani vha tshi vha vhudza uri Mashudu ha ðonifhi vha ðadededzi nahone ha iti mishumo ya tshikolo.
- Mashudu u lwisa Lufuno na Tshibio vhane a khou funana navho vhothe. Lufuno u fhedza a tshi rwiwa nga Tshibio.
- Khwaðhisani u rwa Mashudu nge a mu wanedza a na Tsaiwani hayani
- Mashudu u kuðana na mme awe nga u vha sema musi vha tshi hana a tshi tuwa na Tsaiwani tshikhuwani, izwi zwi tshi itiswa nga muloro we vha u lora
- Mashudu u fhambana na Helīni nge Helīni a wanulula uri Mashudu u khou mu dzhieba munna wawe Tsaiwani. Mashudu u shushedzwa nga lufhangwa vha Helīni ene a vho shavhela badani a tshi khou shavha u thavhiwa a tshaiswa nga goloi.

Magumo

Munwali wa ðirama iyi o kona u shumisa khudano kha u bvedza muhumbulo muhulwane. Ri wana uri Vho-Marīta vha kuðana na vhathu vhanzhi vha tshi imelela Mashudu musi a tshi kaidziwa khà kutshilele kwave kuvhi, zwa fhedza zwo ita uri vhothe vha lozwe matshilo avho nga ñwambo wa u lema na u lemiwa ha Mashudu.

[25]

MBUDZISO YA 13: U LEMA HU FHIRA U LOTSHELWA – MBUDZISO PFUFHI

ULEMA HU FHIRA U LOTSHELWA – IP Demana

- 13.1 Zwine zwa khou vhanga u kudana ndi u vhuya vhusiku ha Mashudu musi khotsi awe Vho-Nefefe vha tshi mu kaidza mme awe Vho-Marīta vha mu imelela. ✓✓ (2)
- 13.2 Mafhundo aya a t̄ana tshipīda tsha mathomov̄ ngauri ndi henefha hune thaidzo ya u lemiwa ha Mashudu nga mme awe Vho-Marīta ya khou thoma hone.✓ (2)
- 13.3 Vho-Marīta ndi mubebi a si na vhudifhinduleli ane a lema riwana.✓✓ (2)
- 13.4 Musi bugu yashu i tshi fhela ri wana Vho-Marīta na Mashudu vha tshi lovha zwi tshi vhangwa nga u lemala ha Mashudu sa zwe Vho-Nefefe vha zwi kaidza musi bugu i tshi thoma.✓✓ (2)
- 13.5 Mafhundo aya a dzumbulula mudzedze wa tshifhinga tsha zwino/musalaunov̄ ngauri vhanna vha a kona u dzula na vhafumakadzi na vhana vhavho vha lugisa zwithu/mafhundo arali hu na zwine zwa khou dina mut̄ani, zwine zwa sumbedza u lingana ha mbeu.✓ (2)
- 13.6 Muñwali u shumisa ndango ya tshiteidzhi nga ndila heyi a tshi t̄oda u bveledza uri Vho-Nefefe vha khou disola kha zwe vha rwisa zwone Mashudu lwo kalulaho.✓✓ (2)
- 13.8 - Zwi ita uri Mashudu a fhedze a tshi xelelwa nga vhumatshelo hawe
- Zwi ita uri a fhedze e ndeñwa
- Zwi ita uri a lozwe vhutshilo hawe
- O vhulaisa mme awe
- Mashudu o t̄ahela Tsaiñwani we a wana uri u na mufumakadzi [Mbuno THARU dzi pfalaho.]✓✓✓ (3)

13.9

Vho Nefefe	Vho Marīta
- Vho-Nefefe a vha lemi vhana	-Vho-Marita ndi mubebi ane a lema ñwana
- Vho-Nefefe vha a kaidza ñwana musi a tshi ita zwo bvaho	- Vho-Marita a vha kaidzi ñwana musi a tshi ita zwo bvaho.
- Vho-Nefefe vha takalela vhana vha tshi funzea	- Vho Marita a vha vholi ndeme ya pfunzo.
- Vho-Nefefe vho funzea	- Vho-Marita a vho ngo funzea

[Mbuno THARU dici pfalaho.] ✓✓✓

(3)

13.10

- Ndi nga thetshelesa khotsi anga na khaladzi anga ngauri ndi vhone vhane vha khou mphatha.
- Ndi nga tanganedza nyimele ine nda vha khayo.
- Ndi nga vhudza mme anga uri kha vha farisane na khotsi anga kha u nnyalusa.
- Ndi nga ḥoda thuso ya vhafunzi uri vha ḫe hayani u thusa kha iyi thaidzo/ dandetande.

[ZWIRARU fhedzi zwi pfalaho.] ✓✓✓

(3)

13.11

EE/Ndi a tendelana nae.

- Ngauri vhone mme awe vho tou ḫitela nga u mu lema.
- Ngauri zwa u sema vhatu u zwi guda kha vhone mme awe/Muri u vhavhaho u bva tsindeni
- Ngauri Vho-Marita a vho ngo thetshelesa musi Vho-Nefefe vha tshi vha kaidzela u lema Mashudu.

KANA

HAI/A thi tendelani nae.

- Ngauri u tea u vha ḫonifha sa mme awe.
- Ngauri ndi lunyadzo saizwi u sema mubebi zwi tshi sumbedza lunyadzo
- Ngauri zwe a ita zwi sumbedza u lemala.

[Mbuno MBILI dici pfalaho.] ✓✓

(2)

[25]

TSHILWAVHUSIKU – TT Mudau

MBUDZISO YA 14: TSHILWAVHUSIKU – MBUDZISO PFUFHI

KHA VHA DZHIELE NZHELE: Vha shumise adendamu iyi khathihi na rubriki i re mafhedziseloni.

Maraga dza mbuno: 15

Maraga dza tshivhumbeo na luambo: 10

Maraga dza tshivhumbeo na luambo dzi avhelwe nga ndila i tevhelaho:

- Tshivhumbeo: (Mathomo, mutumbu, magumo) maraga dza 6
- Luambo: maraga 4 dzo avhelwa nga ndila hei:
 - Arali e kha khoudu 4–5 u wana maraga 4
 - Arali e kha khoudu 3 u wana maraga 3
 - Arali e kha khoudu 1–2 u wana maraga 2

- Izwi hu tou vha mutheo wa u ḥtola/maka mbudziso iyi. Zwi tevhelaho kha zwi shumiswe sa tsumbandila/maga a u thusedza musi vha tshi ḥtola/maka mbudziso iyi.
- Vhalingiwa vha nga ḥnekedza tsumbo/vhupfiwa/mbuno dzo angalalaho vhukuma musi vha tshi tikedza makumedzwa/vhuimo/kuvhonele kwavho.
- Kha vha shumise rubriki i re kha siatari la 26 musi vha tshi ḥtola/maka mbudziso iyi.

ADENDAMU

Marangaphanda

Khudano ndi u sa andana kana u fhambana ha mihumbulo vhukati ha vhabvumbedzwa kana vhatambi kana mutambi ene muñe. Khudano i na tshaka mbili dzine dza vha khudano ya ngomu na khudano ya nnda. Kha ino bugu hu angaredzwa tshaka dzothe dza khudano. Muhumbulo muhulwane ndi zwine dirama kana litambwa la khou amba nga hazwo. Muhumbulo muhulwane diramani iyi ndi wa u sumbedza phambano na dzinndwa vhukati ha vha Swongwozwi na maforotereke nge maforotereke vha hana u tuwa na u dihahedza shangoni la Swongwozwi zwe zwa fhedza zwe vha na masiandaitwa a si avhudzi..

Mbuno

Buguni iyi hu vha na khudano dzo fhambanaho dze dza do bvelela hu u thusedza u bveledza muhumbulo muhulwane wa phambano na khakhathi dza u lwela shango la Swongozwi. Khudano idzi ndi dzi tevhelaho:

- Vhadzulapo vha Swongozwi na Khosi Thovhele Tshilwavhusiku vha kuđana na maforotereke nga murahu ha musi maforotereke a tshi humbelu u swielelwa lwa tshifhinganyana samusi vha vhaftiri vha gondo zwino vhone a vha tsha funa u fhira.

- Maforotereke na Tshilwavhusiku na vhalanda vhawé vha kudána nga murahu ha musi vha tshi vho dzharatela shango líne lí si vhe lavho, le vha tou swielelwá.
- Vhañe vha shango vha kudána na mavhuru musi mavhuru vha tshi vho hana musi vhañe vha shango vha tshi sera darata.
- U rwiwa ha muðuhulu wa Vho Lumbule nga maforotereke zwi vhanga khudano vhukati havho na vhañe vha shango.
- U vhulahwa ha mmbwa na u rwiwa ha Mphelekedzeni ñwana wa Vho Mmbangiseni nga tshimebi, vha tshi mu rwela uri o sera darata nga dzithundu zwo vhanga khudano vhukati havho.
- Luka u kudána na mufumakadzi wawe Ledia nge a vhudza munna wawe u ri vha pfuluwe ene a hana.
- U nyadziwa ha vhañe vha shango nga u shumisa vhatukana na vhasidzana na u toda u renga shango nga kholomo thanu zwi vhanga khudano vhukati havho.
- Mukoma na mmbi yawe u vhudza maforotereke u ri vha tuwe shangoni la Swongozwi, izwi zwi vhanga khakhathi musi vha tshi shushedziwa nga tshigidi vha shavha.
- U sa tenda u tuwa ha Maforotereke Swongozwi zwi vhanga khudano na vhadzulapo zwe zwa swikisa kha nndwa khulu.

Magumo

Muiwali wa dirama iyi o kona u shumisa khudano kha u bveledza muhumbulo muhulwane. Ri wana uri ho vha na khudano nnzhi vhukati ha vha Swongwozwi na maforotereke vha tshi lwela shango zwe zwa fhedza zwo vhulahisa maforotereke nga vhunzhi.

[25]

KANA

MBUDZISO YA 15: *TSHILWAVHUSIKU – MBUDZISO PFUFHI*

- 15.1 Zwine zwa khou vhanga u kudána ndi u lwela shango. Vha Swongozwi vha ri Maforotereke kha vha tuwe ngeno maforotereke vha tshi khou hana. ✓✓ (2)
- 15.2 Mafhundo aya a tana tshipida tsha nyito i takuwaho √ngauri thaidzo ya maforotereke ya u hana u tuwa shangoni la Swongwozwi i khou bvela phanda/hulela.✓✓ (2)
- 15.3 Mukoma u olwa sa muthu ane a vha na nyofho, wa goswi nahone ane a zwifha.✓✓ (2)

- 15.4 Dirama i tshi fhela ri wana uri ho vha na mabulayo manzhi a maforoterekere e a vhangwa nga mmbi ya Tshilwavhusiku sa zwe zwa ambiwa nga mukoma kha nyambedzano. ✓✓ (2)
- 15.5 Ndi mudzedze wa tshifhinga tsha kale/musalaulav̄ ngauri nga tshifhinga tsha kale arali hu na thaidzo ine ya tea u tandululwa mafhongo a hone a sumiwa musanda kha khosi/Mafhongo aya ndi a divhazwakale ya vhukati ha Vhavenda na maforotereke nga misi ila ya vhuhosha Thovhele Tshilwavhusiku. ✓
[U bulu tshifhinga maraga 1, mbuno ya thikhedzo maraga 1.] ✓✓ (2)
- 15.6 Muhumbulo muhulwane ndi wa uri arali na sendelelwa kha shango la vhanwe vhathu ni tea u thonifha vha ni swielelaho ngauri zwa sa ralo zwi nga vhanga dzikhakhathi/Muthu ho ngo tea u tou fhulufhedza tshothe vhathu vhane a si vha divhe ngauri zwi nga itea uri vhathu vhenevho vha u shandukele. ✓✓ (2)
- 15.7 Muñwali u shumisa ndango ya tshiteidzhi nga ndila heyi a tshi toda u bveledza uri Oubaas Piet o vha a tshi khou shushedza vhurumelwa ha Khosi Thovhele Tshilwavhusiku. ✓✓ (2)
- 15.8 - Zwi ita uri Tshilwavhusiku a dzhielwe shango nga Maforotereke.
- Zwi ita uri hu vhe na mabulayo vhukati ha vhadzulapo vha Swongozwi na Maforotereke.
- Zwi vhanga vhuswina vhukati ha mavhuru na vhadzulapo.
vha Swongozwi.
- Zwi ita uri vhanwe vha vhadzulapo vha rwiwe nga maforotereke vha songo tshinya tshithu.
- Zwi ita uri vhanwe vha vhadzulapo vha vhulawé.
- Zwi vhulahisa maforotereke manzhi nga mmbi ya Tshilwavhusiku.
- [Mbuno THARU dzi pfalaho.]✓✓✓ (3)

15.9	Tshilwavhusiku	Luka
	<ul style="list-style-type: none"> - Tshilwavhusiku ndi khosi ya Vhulenda. - Ndi khosi ine ya vhavhalela vhai\bar{w}e vhathu - Khosi ya u thetshelesa vhalanda Vhayo - Ndi khosi i sa tendi kha u dzhia zwithu zwa vhai\bar{w}e nga khani. 	<ul style="list-style-type: none"> - Luka ndi munna wa tshituhu. -Luka ha vhavhaleli vhai\bar{w}e vhathu -Luka ha pfi tsha muiwe -Luka u tenda kha u dzhia zwa vhai\bar{w}e nga khani.

[Mbuno THARU dici pfalaho.] $\checkmark\checkmark\checkmark$

(3)

- 15.10
- Ndi nga vha humbelu uri hu vhe na mu \bar{t} angano na vhavhulahi uri ri dzudzanye mafhungo na u \hat{d} ivha tshiitisi tsha bulayo.
 - Ndi nga ya nda vha pota mapholisani uri vha nthuse.
 - Ndi nga lwa na maforotereke.
 - Ndi nga dzhia vhukando ha mulayo.
 - Ndi nga zwi \hat{t} anganedza nda rabela kha Mudzimu uri a nthuse

[ZWIRARU fhedzi zwi pfalaho.] $\checkmark\checkmark\checkmark$

(3)

- 15.11 Ee/Ndi a tendelana navho.

- Ngauri muthu u tea u tsireledza ndaka yawe.
- A hu na mulayo une wa vha thivhela u bvaho kha vhavhusi vha Swongozwi.

KANA

Hai/A thi tendelani navho.

- Ngauri arali muthu a swielelwa kha shango \hat{l} a vhai \bar{w} e ha iti zwine a funa
- Ngauri zwi sumbedza u nyadza vha \bar{n} e vha shango.
- Ngauri mufhiriwagondo ha na ma \bar{a} nda a u langa vha \bar{n} e vha shango

[Mbuno MBILI fhedzi dici pfalaho.] $\checkmark\checkmark$

(2)

[25]

**THANGANYELO YA KHETHEKANYO YA C:
 MARAGAGUTE:**

25

80

KHETHEKANYO YA A: RUBRIKI YA U TOLA MAANEA A LITHERETSHA – MBUDZISO NDAPFU: VHURENDI [MARAGA: 10]

Khritheria	Vhukoni ha nthesa	Tshikili Tshone	Vhukoni ha vhukati/ho linganelaho/vhu fushaho	Vhukoni ha fhasi	U sa kona
ZWI RE NGOMU	5–6	4	3	2	0–1
Tsenguluso ya thoho Tshidziki tsha mafhundo/u khwathisedza nga vhutanzi na kupfesesele kwa tshibveledzwa ZRN=6 MARAGA DZA 6	<ul style="list-style-type: none"> - Tsenguluso yo nwelelaho ya thoho - Mbuno dzo angalalaho dzi gobolaho; hu na khwathisedzo yo diaho u bva kha tshirendo - U pfectesa ha nthesa ha lushaka lwa liwalwa (vhurendi) na tshirendo 	<ul style="list-style-type: none"> - U sumbedza u pfectesa na u sengulusa thoho nga ndila yone - Phindulo ndi yo faredzaho zwidodombedzwa zwi khagala - Mbuno dzi pfadzaho dzo nekedzwa, naho dziriwe dzadzo dzi songo tou tikedzwa u swika henehfo - U pfectesa ha lushaka lwa liwalwa (vhurendi) na tshirendo 	<ul style="list-style-type: none"> - Tsenguluso i fushaho/linganelaho ya thoho - Hu na dziriwe mbuno dzavhuudi dzi tikedzaho thoho - Naho dziriwe dza mbuno dzo tikedzwa, hu di vha na vhutanzi vhu sa tendiseaho - U pfectesa ha mutheo ha lushaka lwa liwalwa (vhurendi) na tshirendo 		<ul style="list-style-type: none"> - A hu na u pfectesa ha thoho - A hu na thikhedzo u bva kha tshirendo - Mugudi ha na ndivho ya lushaka lwa liwalwa (vhurendi) na tshirendo
TSHIVHUMBEO NA LUAMBO TL=4 MARAGA 4	4	3	2	1	0-1
Tshivhumbeo, thevhekano i pfadzaho na kunekedzelwe kwa mafhundo Luambo, thouni na tshitaila zwo shumiswaho kha maanea/phindulo ndapfu	<ul style="list-style-type: none"> - Tshivhumbeo tsho lunzhedzanaho tshothe - Mbuno dzo lundwa tshidle nahone dza bveledzwa zwi khagala tshothe - Luambo, tshitaela, na thouni zwo vhivba, zwi a tokonya, nahone zwo lulama - A hu na vhukhakhi vhu vhonalo ha girama, mupelelo na zwiga zwa u vhala 	<ul style="list-style-type: none"> - Tshivhumbeo tshi re khagala na mbuno dzi tevhelelano lu pfadzaho - Thevhekano ya mbuno i a pfadza - Luambo, thouni na tshitaela vhunzhi zwo lulama 	<ul style="list-style-type: none"> - Hu di vha na vhuriwe vhukhakhi ha tshivhumbeo - Maanea/Phindulo i shaedza thevhekano yo fhateaho ya kupfesesele na ndunzhendunze - Luambo lwo faredza vhukhakhi vhu si gathi, thouni na tshitaela hunzhi zwo tea 	<ul style="list-style-type: none"> - Tshivhumbeo tsho pulaniwa lwo khakheaho - Mbuno a dzo ngo dzudzanywa lu pfadzaho - Vhukhakhi ha luambo vhu khagala - Thouini na tshitaila a zwo ngo tea 	<ul style="list-style-type: none"> - Tshivhumbeo tsho khakheao tshothe - Vhukhakhi vhunzhisa ha luambo na tshitaila

THANYELANI: Arali mulingiwa a sa dzhiela zwi re ngomu lwa tshothe a nwala maanea, kha vha mu avhele maraga dza 0 kha zwi re ngomu, tshivhumbeo na luambo.

KHETHEKANYO YA B NA C: RUBRIKI YA U TOLA/MAKA MAANEA A LITHERETSHA – PHINDULO NDAPFU: NGANEA/FOLUKULOO NA DIRAMA [MARAGA: 25]

Khritheria	Vhukoni ha n̄thesa	Tshikili tshone	Vhukoni ha vhukati/ho linganelaho/vhu fushaho	Vhukoni ha fhasi	U sa kona
ZWI RE NGOMU	12–15	9–11	6–8	4–5	0–3
Tsenguluso ya thoho Tshidziki tsha mafhundo/u khwathisedza nga vhutanzi na kupfesesele kwa tshibveledzwa MARAGA 15 ZRN= 15	<ul style="list-style-type: none"> - Phindulo ya mathakhethakheni/n̄thesa: 14–15 - Phindulo ya mathakheni/n̄tha: 12–13 - Tsenguluso yo nwelelaho ya thoho - Mbuno dzo angalalaho dici gobolaho; hu na khwathisedzo yo dziaho u bva kha tshibveledzwa - U pfesesa ha n̄thesa ha lushaka lwa liwalwa na tshibveledzwa 	<ul style="list-style-type: none"> - U sumbedza u pfesesa na u sengulusa thoho nga ndila yone - Phindulo ndi yo faredzaho zwidodombedzwa zwi khagala - Mbuno dziwe dici pfadzaho dzo nekedzwa, naho dziwe dzadzo dici songo tou tikedzwa u swika henehfo - Hu na vhutanzi ha u pfesesa lushaka lwa liwalwa na tshibveledzwa 	<ul style="list-style-type: none"> - U pfesesa thoho lwo linganelaho/hu songo godombelaho; a si zwehe zwitalusi zwe dodombedzwaho - Hu na dziwe mbuno dici tikedzaho thoho - Maiwe makumedzwa o tikedzwa, fhedzi vhutanzi a vhu tendisei tshifhinga tshothe - U pfesesa liwalwa na tshibveledzwa hu songo fhelelaho 	<ul style="list-style-type: none"> - U pfesesa thoho lwa u tou phuphuledza; a hu tou vha na zwiwe zwitalusi zwe senguluswaho nga vhudalo - Mbuno thukhu dici tikedza thoho - Makumedzwa a tshimbilelanaho ndi matuku - U pfesesa hutuku ha liwalwa na tshibveledzwa 	<ul style="list-style-type: none"> - U pfesesa hutukutuku ha thoho - Ndingedzo yo rembedaho/i songo khwathaho ya u fhindula mbudziso - Makumedzwa ha tendisei na kathihi - Mugudi ha na ndivho ya lushaka lwa liwalwa kana tshibveledzwa
TSHVHUMBEO NA LUAMBO	8–10	6–7	4–5	2–3	0–1
Tshivhumbeo, thevhekano i pfadzaho na kunekezelwe kwa mafhundo Luambo, thouni na tshitaila zwe shumiswaho kha maanea/phindulo ndapfu MARAGA 10 TL=10	<ul style="list-style-type: none"> - Tshivhumbeo tsho lunzhedzana tshothe - Marangaphanda na magumo ndi zwa n̄thesa - Makumedzwa o vhekanya zwavhu di nahone a bveledzwa zwi khagala - Luambo, tshitaela, na thouni zwe vibva, zwi a tokonya, nahone zwe lulama 	<ul style="list-style-type: none"> - Tshivhumbeo tshi re khagala na makumedzwa a tevhelelanaho lu pfadzaho - Marangaphanda na magumo na dziwe phara zwe dzudzanywa nga ndila yo faranaho - U tevhekana hu pfadzaho ha makumedzwa - Luambo, thouni na tshitaela hunzhi zwe tea 	<ul style="list-style-type: none"> - Hu na vhuiwe vhutanzi ha tshivhumbeo - U pfadza na ndunzhendunzhe zwi di vha hone, fhedzi zwe faredza vhukhakhi - Hu na vhukhakhi vhu vhonalo ha luambo; thouni na tshitaila hunzhi zwe tea 	<ul style="list-style-type: none"> - Tshivhumbeo tsho pulaniwa nga ndila yo khakheaho - Makumedzwa ho ngo vhekanya nga ndila i pfadzaho - Vhukhakhi ha luambo vhu khagala - Thouni na tshitaela a zwe ngo tea 	<ul style="list-style-type: none"> - U shaea ha tshivhumbeo tsho pulaniwaho zwi khakhisa thevhekano ya likumedzwa - Vhukhakhi ha luambo na tshitaila zwi itisa uri phindulo iyi i kundelwe u swikelela - Thouni na tshitaela a zwe ngo tea - Phara dzo khakhea
MARAGANYANGAREDZI	20–25	15–19	10–14	5–9	0–4